

## **Тоҳо сураси, 130-132**

05:00 / 23.01.2017 17500

**130. Бас, улар айтаётган нарсаларга сабр қил. Роббингга қуёш чиқишидан олдин ва ботишидан олдин тасбих ва ҳамд айт. Шунингдек, кечанинг бир қисмида ва кундузнинг атрофида ҳам тасбих айт. Шоядки рози бўлсанг.**

Эй Мухаммад, шундай экан, кофир ва мушрикларнинг нохуш гап-сўзларига, сўкишларига, иғво-бўхтонларига сабр қил. Ҳа,

«Бас, улар айтаётган нарсаларга сабр қил».

Кофирлар доимо мўминларни хафа қиласидиган, уларга озор берадиган нарсаларни айтишага одатланганлар. Улар айтаётган нарсаларга сиқилиш ёки хафа бўлишнинг ҳожати йўқ.

«Роббингга қуёш чиқишидан олдин ва ботишидан олдин тасбих ва ҳамд айт».

Доимо Роббингга тасбиху ҳамд айт. Қуёш чиқишидан олдин ҳам, қуёш ботишидан олдин ҳам Роббингга тасбих ва ҳамд айт.

Уламоларимиз, Роббингга қуёш чиқишидан олдин тасбих айтдан мурод Бамдод намозини адо эт, Роббингга қуёш ботишидан олдин тасбих айтдан мурод Аср намозини адо эт, деганидир, деганлар.

«Шунингдек, кечанинг бир қисмида ва кундузнинг атрофида ҳам тасбих айт».

Кечанинг бир қисмида ҳам Роббингга тасбих айт, яцни, Шом ва Хуфтон намозларини адо эт. Кундузнинг атрофида ҳам тасбих айт, яцни, Пешин намозини адо эт.

«Шоядки рози бўлсанг».

Албатта, рози бўласан. Роббинг ҳам сендан рози бўлади.

**131. Кўзларингни уларни синаш учун айримларига баҳраманд қилиб берганимиз ҳаёти дунёning турли зийнатларига тикма. Роббингнинг ризқи яхши ва боқийдир.**

Биз бацзи кофирларга берган турли зебу зийнатларга ҳавас билан боқма. Улар бу ҳаёти дунёning матоҳи, холос. Биз уларга бу матоҳларни синаш учун вақтинча берганимиз. Беш кунлик дунёning зебу зийнатида бақо йўқ. Бирпасда заволга учрайди.

«Роббингнинг ризқи яхши ва боқийдир».

Роббинг сенга берган ризқ энг яхши ризқдир, энг боқий ризқдир. У вақтинчалик эмас, доимийдир. У синаш учун эмас, сийлаш учундир.

**132. Аҳлингни намозга амр эт ва ўзинг унга сабр қил. Биз сендан ризқ сўрамасмиз. Биз сенга ризқ берамиз. Оқибат тақвоникидир.**

Мусулмоннинг биринчи бурчи аҳлини, оиласини мусулмон қилишдир. Бу ишда намоз муҳим ўрин тутади. Шунинг учун аҳлингни, оила аҳзоларингни намоз ўқишга буюр. Ўзинг ҳам сабр ила намозда бардавом бўл ва аҳлингни намозга ундашда давом эт.

Аллоҳ сендан бошқа нарсани сўрамайди.

«Биз сендан ризқ сўрамасмиз. Биз сенга ризқ берамиз».

Ўша берган ризқимизга шукр қилиб, намоз ўқи ва намозга буюр.

«Оқибат тақвоникидир».

Яхши оқибатга сазовор бўлиш тақвога боғлиқдир.